## 《佛說觀自在菩薩如意心陀羅尼呪經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 20. No. 1081

No. 1081 [Nos. 1080, 1082, 1083]

佛說觀自在菩薩如意心陀羅尼呪經

## 唐三藏法師義淨奉 制譯

如是我聞。一時薄伽梵。在伽栗斯山。與大菩薩無量眾俱。爾時觀自在菩薩摩訶薩。來詣佛所頂禮雙足。右繞三匝以膝著地。合掌恭敬白佛言。世尊我今有大陀羅尼明呪大壇場法。名青蓮華頂栴檀摩尼心金剛祕密常加護持。所謂無障礙觀自在蓮華如意寶輪王陀羅尼心呪第一希有。能於一切所求之事。隨心饒益皆得成就。世尊大慈聽我說者。我當承佛威力施與一切眾生。世尊此陀羅尼有大神力大方便門。我今親對佛前次第宣說。惟願世尊垂哀加護。於我及一切持明呪者。雨妙珍寶猶如意樹如意寶珠。於諸眾生令其所有悕求應時果遂。爾時世尊讚觀自在菩薩言。如是如是汝能悲愍諸有情類。我加護汝即對我前。令汝願求一切滿足。汝欲宣說無障礙觀自在蓮華如意寶輪王陀羅尼者。最極甚深隱密心呪隨汝意說。時觀自在菩薩。既蒙佛許悲願盈懷。即於佛前以大悲心而說呪曰

南謨佛馱耶 南謨達摩耶 南謨僧伽耶 南謨觀自在菩薩摩訶薩 具大悲心者 怛姪他 唵斫羯羅伐底 震多末尼謨訶 鉢蹬謎 嚕嚕嚕嚕 底瑟他 篅(入聲)攞痾羯 利沙也 吽發莎訶

次說大心呪

菴鉢踏摩 震多末尼 篅(同前)攞吽

次說隨心呪

菴跋剌陀 鉢亶謎吽

爾時觀自在菩薩摩訶薩。說是大輪陀羅尼呪王已。即時大地六種震動諸有天宮龍宮及藥叉宮。健達婆阿蘇羅緊奈羅等宮殿。亦皆旋轉迷惑所依。一切惡魔為障礙者。見自宮殿皆悉焰起無不驚怖。惡心眾生惡龍惡鬼。藥叉羅剎皆悉顛墜。於地獄中受苦眾生。皆悉離苦得生天上。于時會中於世尊前。天雨寶華寶莊嚴具。於虛空中奏天伎樂。出種種聲廣陳供養。爾時世尊以美妙音。讚觀自在菩薩摩訶薩言。善哉善哉觀自在。汝所宣說是大呪王實難逢遇。能令眾生求願滿足獲大果報。若誦此呪所有法式我今當說。若有善男子善女人苾芻苾芻尼鄔波索迦鄔波斯迦。發心悕求此生現報者。應當一心受持此呪。欲受持時不問日月星辰吉凶并別修齋戒。亦不假洗浴及以淨衣。但止攝心口誦不懈。百千種事所願皆成。更無明呪能得與此如意呪王勢力齊者。是故先當除諸罪障。次能成就一切事業。亦能銷除受無間獄五逆重罪。亦能殄滅一切病苦皆

得除差。一切重業悉能破壞。諸有熱病或畫或夜。或一日瘧乃至四日瘧。風黃痰癊三 集嬰纏。如是病等誦呪便差。若有他人厭魅蠱毒。悉皆銷滅無復遺餘。假使一切癰癭 惡瘡。疥癩疽癬周遍其身。并及眼耳鼻舌脣口牙齒咽喉頂腦胸脇心腹腰背脚手頭面等 痛。支節煩疼半身不隨。腹脹塊滿飲食不銷。從頭至足但是疾苦無不痊除。若有藥叉 羅剎。毘那夜迦惡魔鬼神。諸行惡者皆不得便。亦無刀杖兵箭。水火惡毒惡風雨雹。 怨賊劫盜能及其身。亦無王賊無有橫死來相侵害。諸惡夢想蚖蛇蝮蠍。守宮百足及以 蜘蛛。諸惡毒獸虎狼師子悉不能害。兵戈戰陣皆得勝利。若有諍訟亦得和解。若誦一 遍如上諸事悉皆遂意。若日日誦一百八遍。即見觀自在菩薩告言。善男子汝等勿怖。 欲求何願一切施汝。阿彌陀佛自現其身。亦見極樂世界種種莊嚴如經廣說。并見極樂 世界諸菩薩眾。亦見十方一切諸佛。亦見觀自在菩薩所居之處補怛羅山。即得自身清 淨。常為諸王公卿宰輔恭敬供養眾人。愛敬所生之處不入母胎。蓮華化生諸相具足。 在所生處常得宿命。始從今日乃至成佛。不墮惡道常生佛前。爾時觀自在菩薩白佛言 。世尊此栴檀心輪陀羅尼如我所說。若苾芻苾芻尼鄔波索迦鄔波斯迦。若有至誠心所 憶念。能受持者必得成就。惟須深信不得生疑(更有藥法在本藏中此隱不出)爾時世尊讚觀 自在菩薩善哉善哉汝大慈無量。乃能說此微妙如意心輪陀羅尼法。於贍部洲有諸眾生 。發心口誦即得親驗。汝依我教於諸有情。數數勤加策勵示誨。令得證驗為現其身。 莫違我勅我當隨喜。時觀自在菩薩白佛言。世尊我於無量劫來。以慈悲心於受苦眾生 常作擁護惟願證知。為眾生故說此如意輪陀羅尼。若有受持常自作業。專心誦者所願 成辦。我今承佛威力如是救苦。爾時觀自在菩薩。說此如意輪羅尼經已。一切大眾皆 悉歡喜信受奉行

佛說觀自在菩薩如意心陀羅尼呪經